

Ci djoû là, l' blanke mârmote, on castôr, on singlé
Qu'èstin.n', chake di s' costé, l' raculot dèl famille,
Sôrtis d'one pôve culote, s'arindjenut po-z-aler
Fé fôrtune dins on cwin qu' -gn-a dès sous tant qu'à mile.
Quand il ont yeû quité grand bwès, bouchnis', ètang,
Truvièrsé do payis, rèscontré mwints fèrdin.nes,
Vo-lès-là atèris pa-d'avant l' monde tot sbarant
Qui tot î èst r'lûjant, fin vèt', èt rin qui trin.ne.
Dès stindéyes di bleuwe aîwe, dès pachis j'qu'à todi,
Dès grands fwârts sauvadjes-aubes, dès pus p'tits plins d' frûtadjes ;
Nos pèlèrins, sbarés, ont trové l' paradis !
Portant, po-z-î avinde, faurè co do coradje.
I s'î vèyin.n' dèdja, mins ç'aureut stî trop bia :
C'èst qu'il èst rèssèré au mitan d'on wachis' ;
Plin d' sèrpints èt d' cwârpèsses qui r'lûjenut au solia
Èt qu'ont l'aîr di s' bin plaîre dins on parèy tchinis'.
S'on-z-î vout ariver, i l' faurè bin passer !
Tot tchôd-tchôd ènawêre, on tûze èt on ratûze ;
Po c'mincî, l' blanke mârcote, doûcètémint, vout risquer
One pate, mins èle li r'ssatche : « Vos pinsez qu' ça m'amûse ?
Ça, c'èst dèl tchau d' mouton, c'èst nin po nosse grognon !
Minme si dj'î vou aler, dj'ariverè tote man.nète,
Mi qu'è-st-aroutinéye à bin fé atincion,
À m' lâver, m' bèsognî, à bin pwarter twèlète.
– Mwints côps, di-st-i l' castôr, li tims, lès protècsions
Èt one miète di pacyince vègnenut à d'bout d' l'ovradje !
Ni rovioz nin qui mi, mi mèstî, c'èst maçon :
I n' faut, po bâti l' pont, qu' do tims èt do coradje.
Dji v' vou bin garanti qu' dins one quinzin.ne di djoûs,
Gn-aurè moyin d' passer nos trwès sins maus sins rûjes.
– Quinze djoûs ? Èt su ç' tims là, s'i fait mwaîs èt qu'i ploût ,
Ou qui lès quate solias tchaufenut jusqu'à ç' qu'on cûje ?
Mi, dji m' vos l' va mostrer comint qu'i vos faut fé ! »
Èt sins tchicter, l' singlé zoupèle dins lès bèrdouyes :
Wachoter lès crapôds, cwârpèsses, èt cobourer
Lès sèrpints què l'ont pris por on p'tit Djan-mès-couyes.
Todi è-st-i qu' noste ome, arivé d' l'ôte costé,
Quand i s'a yeû choyu, spaumé, i s' rècrèstéye,
Po critî, l' grandiveûs, aus soçons èwarés :
« Ç' qui v' manque, c'èst do coradje, do front, surtout d' l'idéye ! »

Albert Delvaux